

Te taata 'toa, e ere e Ta-
vana e te haava, o tei hi-
naaro i te hoe hohoa o tei-
enei *vea*, aufau mai ia e
3 farane no na avae etoru.

Faanu mai ia Tepito te ne-
nei parau i Papeete.

TE VEA NO TAHITI,

Ei haaparare raa i te parau rii api e faufaa hia'i to
te mau fenua i roto i te Hau Tamaru; e neia i te mau mahana maha toa.

O te feia hoo taao, e te mau
taata e haapao i te tau
raa taao, e tia ia ia nenei
atoa hia ta ratou mau pa-
rau faaite i roto i reira
*Ve*a, ia aufau mai ratou
1 farane no te reni hoe.

Faanu mai ia Tepito te ne-
nei parau.

PAEAU PARAU NO TE HAU.

*Ture no te faaore rra i te horo raa no te hara
rii haihai, faatia hia e te Apoo raa iriti raa
ture no te matahiti 1853.*

IRAVA 1.

Na te haava mataeinaa, e haava i te mau ha-
ra nainai atoa i tuu hia tu iana ra e te feia to-
roa o te mataeinaa, e e ore e tia ia horo hia.

IRAVA 2.

Te faariro hia nei ei hara rii nainai, te mau
hara toa i faaite hia mai i roto i te mau irava 2,
3, 4, 5, 6 e te 7 o te ture V no te ava, e te ha-
mani raa; tei faaite hia mai hoi i roto i te irava
4 o te ture XVIII no te haapii raa tamaru; e tei
faaite hia mai i roto i te irava 8 o te ture XXXII
no te mau ohipa e au i te taata toa ia rave.

IRAVA 3.

Te mau haava, te mau mutoi, e te tahi mau
taata toroa nae ra, te au ia horo, ia haava hia
ratou no teienei mau hara i faaite hia nei; no te
mea ia faautua hia ra, e ore atoa ia to ratou to-
rona.

Papeete, te 24 no Tiunu 1853.

Te peretiteni o te Apoo raa iriti raa ture.

TAIRAPA.

*Faatia hia e te Arii vahine o te mau
fenua Totaiete,*

Papaihia : POMARE.

*Faatia hia e te Tavara, te Auvaha
o te Emepera,*

Papaihia : PAGE.

APOO RAA IRITI RAA TURE.

Mahana 22 no Tiunu 1853.

Peretiteni raa no Tairapa.

Maheanuu. Ua taio mai i te hoe ani raa, ei te
mataeinaa ra rave ai te feia faautua hia i ta ra-
tou utua, eiaha ei Papeete nei.

Tati. E mea maitai roa te tono mai i te feia
faautua hia i Papeete nei, no te mea te oti ra ta
ratou utua, te faufaa hia ra hoi ta te ture vahi i
titau mai. Io tatou aera, aita roa e oti raa te u-
tua, te faautua noa nae ra, aita ra e rave hia.

Tapute. Te faatia nei au i teienei ani raa, ei
te mataeinaa mau a rave haere ai te mau utua.

Piapa. E vahi maitai toa teie, te faatia nei
au. Teie ra te hoe vahi hio hia e au, te parau

mai nei te ture, e ia faautua hia te taata, ia hoe
ae ahuru ma pae mahana te rave raa i te ohipa
na te hau, o tana ia utua i faaite hia mai i roto i
te ture; aita tura ia i haapao hia, te pohe nei te
avae taa toa i te rave raa i te ohipa na te hau,
teihea ra ia irava ture i na reira mai.

Briot. E hio maitai mai na e homa i te mea i
tia i te hau i te faaue atu i te mau tavara e a-
ratai mai i taua mau taata faautua ra, ei Papeete
nei rave ai ta ratou utua. Ua ite noa te hau, e i
te tahi mau mataeinaa, aore roa taua mai taata
faautua ra, e rave na i ta ratou utua; no te pa-
ruparu e te toaruaru o te feia toroa i ore ai. Ua
itea ra, e e mea rave taiata roa te reira vahi, a-
rea tu ai hoi i Papeete nei, e mea rahi to o nei
mutoi, e te tia maitai nei te mutoi i taua feia faa-
utua ra i te mau mahana toa, e e moe a vetai ta-
hi, e ore e rave maitai i te mau mahana toa;
nahea ihora ia i to outou na mau mataeinaa, tei
ore i rahi rea te mutoi. E ere te mea tia i mua
i te aro o te ture nei, te faautua noa i te taata
e atira i reira; te titau hua mai ra te ture, ia
rave taua taata i faautua hia'ra i tana utua. Te
maru atoa nei hoi te hau, ia ite oia i te hoe ma-
taeinaa i te itoitaitaitai i te faarave raa hia taua
feia faautua' hia ra i ta ratou utua, e ia an- mai
taua tavara no taua mataeinaa ra, i te tahi pae
o taua mau taata ra, te faatia tu nei te hau, a-
ore roa e patoi raa tu i te reira tavara. Teie hoi
te hoe mea i tia'i, no te mea ua ite noa outou e
vahi ohipa rahi roa teie, o te oire rahi hoi Pa-
peete nei no Tahiti. e e mea tia ia faanebenehe
hia i teienei mau ohipa; e tei reira hoi te rahi
raa o ta te hau nei ohipa. Te parau mai nei te
hoe iriti ture, e hoe ahuru ma pae mahana tei
haapao hia e te ture, e te faarave hia nei ratou
i te avae taa toa; e vahi tia roa boi te reira i te
ture nei, no te mea te faaite maira te hoe irava
ture i te rahi o te ohipa i haapao hia no te ma-
hana hoe, e no te mea, aore taua ohipa ra i oti i
roto i teienei tau mahana hoe ahuru ma pae,
no reira i afai roa hia, i nia i ta avae hoe.

Nuutere. E parau mau teie e parau hia mai e
te hau nei, ua ite maitai roa vau, i te tahi tau
mataeinaa ta'u i haere, aore roa i oti te utua i
faaite hia mai e te ture, tai tahi noa iho etaeta
rii te i oti, tirara, o te utua anei ia i haapao hia.
E vahi mauruuru roa na'u teie e aratai hia mai
i Papeete nei, no te mea, te mana ra te ture, e
te oti ra te utua i haapao hia. E mea maitai anei,
te faautua noa, e eiaha e rave i te utua, o to ou-
tou anei ia hinaaro? Ia mana hoi ta tatou ture e
maitai ai. Eita roa e tia ia'u teienei ani raa. E

664
tuu ra oe e te peretiteni na roto i te ravea, ia itea to te Apoo raa manao.

Peretiteni. Ua na roto i te ravea e ua rahi to te Apoo raa i te faatia e e hahae atu taua ani raa ra, eiaha tuu hia i te komite hiopoa ture ra.

Ua faaue faahou i te auvaha o te komite e taio mai i te ani raa a te hoe iriti ture no te Tuamotu, no te mau taoa e hoo hia, ia piti ae ohe mori i te tara hoe, e piti ahuru ma pae parau, hoe ia tara; e pae ahuru opaa, hoe tara; e ua taio hia e Maheanuu.

Ote. E ture oti teie, tei roto i te ture maha nei; tei te taata o tona hinaaro; ia hinaaro te faata mori, ia piti ohe hoe tara ra, tei iana iho ia e te taata i hoo mai, ia hinaaro oia e piti ohe mori, hoe ahuru tara, tei iana iho ia, aita roa ta te ture e faahapa raa iana, hahae atu tena, a maua noa te taine i te imi raa i tena parau.

Tani. Ua na reira loa mai tana parau.

Taihaa. Eiaha na outou o ru noa i te parau e hahae, o ta matou teie tau taoa i to matou ra fenua, aita 'tu; no 'reira i tia i ia matou i te faature, te maua noa nei ta matou faufaa, e uene rahi roa to te papaa, ia parau atu matou i te hoo mau ra. aita rea e faaroo mai, e na o mai te parau ia matou, tehea te ture, aita tura hoi ta matou e ravea, ia oti ra i roto i te ture, e tia ia matou ia faaite atu, e ia titau atu i te hoo mau.

Nuutere. E imi maité na i teienei parau, e tamata aena i te tuu i te komite ra, e na ratou e imi, e ia taa. na ratou e haamaramarama mai ia tatou. E feia aroha rahi teie na 'u, té pau noa nei ta ratou taoa i te hoo rii nainai roa.

Ote. E haapao a tatou i te ture i oti, tei te taata o tona hinaaro; ia titau te taata taoa i te hoo, e ia ore ia faatia hia mai e te papaa. eiaha ia e horoa tu. Te na reira nei tatou i tahiti nei, e na reira toa ratou, aore hoi e ture i parau mai ia tatou i to Tahiti nei, e mea ohe mori ra, e mea ia hoo. E ore e tia, hahae atu.

Poroi. E maa ture maitai roa teie, ahiri e tia, e ture hinaaro atoa hia e tatou e homa e to Tahiti nei, ua ani onoono ma ite tatou i te tahi maiti nei, ia na reira hia te anani, e no te tia ore i to tatou tavana, ore atura. Te manao atoa nei ra vau e ore e tia, e ore e noaa te hoo i hinaaro hia e tatou, no te mea, te rahi nei to tatou hinaaro i te taoa a te papaa, e vaiho noa ra i ta tatou nei ture tahito.

Peretiteni. Ua na roto oia i te ravea, e ua rahi roa to te Apoo raa i faatia, e tuu i roto i te rima o te komite hiopoa ture.

M. Briot. Te faaite atu nei au ia outou i te hoe ture, imi hia e te hau, no te faaore raa i te horo raa no te mau hara rii haibai; te parau nei te ture XXXI e e tia i te mau taata tahiti ia haava hia i roto i te mataeinaa e tona iho haava, e ia oti e tia iana ia horo i te tiripuna a te auvaha ra, e te hopea, e afai i taua parau nana ra i te haava raa rahi a te mau Toohitu.

E mea tia ia tamau maite a i teienei horo raa,

mai te mea, e hara rarahi, o te faautua hia i te utua rarahi ra; e parau ra ia, i te tiamia o te taata toa nei, te ore e tia ia tuu roa hia na te teata hoe e faataa.

PARAU FAAITE.

Te faaite hia 'tu nei to te mau mataeinaa 'toa, o e tau pahi teie i tapae mai nei, ua i i te eéao; ua tapae mai hoi ratou i Papeete nei, e hoo haere i te maa rii na te feia eéao i nia iho i taua mau pahi ra.

E poupou rahi roa hoi to matou i te bio raa i te tapati i mairi aenei, e ua i roa te matete i te maa, e te ia, o tei uta hia mai e to Moorea. Aore hoi taua maa ra i roroa noa e, pau roa aera i te hoo hia. E teienei ra hoi, te hio faahou nei a matou e, te toaruaru rii faahou ra te taata; te uta rii mai nei a hoi tahi pae mataeinaa i te maa; area ra te ia, ua huru ore roa ia. E mahere paha to te mau mataeinaa i te otohe haere e, o ore e tia te uta raa mai i te maa, no te mea, te rahi ra te ohipa hau i roto i te mau mataeinaa. Ua haamanoa a tita hia tei reira vahi, e i teienei, te faaite hia 'tu nei te mau tavana mataeinaa, e mai te mea e, e tere uta maa mau to tehoe taata ra, eiaha ia e tapae hia, e tuu mai ra, ia uta mai a i te maa i Papeete nei, e te ia atoa hoi, no te mea, o tei reira tei rahi roa i te hinaaro hia, e te papaa, e te taata tahiti atoa.

Te faaite atoa hia 'tu nei hoi to te mau mataeinaa e e upea teie, te hoo haere hia nei. E vahi rahi roa tai pau aenei, te rahi nei a ra te toe. E ere te mea, hoo rahi, tai toru noa iho farane i te etaeta hoe. I teienei ra, te hinaaro na te teata i tei reira ohipafautaa rahi, oia hoi te tautai; e tii mai ia i te upea e tia, e hoo; e ia roaa 'tu iana ra. e uta mai ia i te ia, e i noa 'tu te matete. E faaitoito maite, eiaha hoi te roo maitai o to tatou fenua ia mure. Ena reira 'toa to Moorea, eiaha 'toa to ratou puai, i te uta raa mai i te ia ra, ia mure.

Te mau pahi i tapae mai, mai te mahana 20 mai a no Tiurai.

Tira toru farani o *Bon Père*, tapena Dubedat, mai Rochefort mai.

Tira piti heratane o *Royalist*, tapena Harris, mai Vaihi mai.

Tira piti o te hau o *Nouhiva*, tomama Boulangé, mai Matuaita mai.

Tira toru farani o *Damblat*, tapena Blanchard, mai Tarifonia mai.

Te mau pahi i reva.

Tira piti farani o *Caroline*, tapena Rousseau, ua reva i Matuaita.

Te eé no te Tavama : BRIOT.